

Gih Raeuz Gak Dieg Gak Cuz Beixnuengx Angq Gvaq “Sam Nyied Sam Bouxcuengh”:

Cawjdaez Hozdung Lai Cungj Lai Yiengh Heiq Ndei Yienj Mbouj Sat

全区各地欢度“壮族三月三”主题活动丰富多彩 好戏连台

Bonjbauq siusik (gicej Vangz Sinhjungz) “Sam nyied sam” mbouj-dan dwg ngoenzciet youqgaenj Bouxcuengh gih raeuz, caemh dwg ngoenzciet conzdungj Gun、Yauz、Myauz、Dung daengj cojyouq minzcuz de, moix bi ngoenz neix, gak cuz beixnuengx doxcomz youq giz ndeu, eu fwen ciengq go, yienj heiq diuq foux, guh gak cungj gak yiengh vwnz dij hozdung, angqyangz vuenheij, beij gvaq ndwencieng lij hoengh. Bineix dwg gih raeuz bi daih’ it dingh liggaueq “sam nyied sam” guh ngoenz cuengqgyaj daengxgyoengq vunzlai, daengx gih gak dieg youq gak gaep dangjvej cwngfuj sonyinx lajde, caez guh gak cungj gak yiengh hozdung, hawj ngoenzciet angqyangz hoenghhd.

“Bibi sam nyied sam, bi caemh mbouj doengz bi; sing fwen goj ndaej nyi, vwnz dij guh engq hoengh.”

Youq Swcigih Soujfuj Namzningz Si, Gvangjsih Minzcuz Bozvuzgvanj 4 nyied 2-3 hau comz guh Bouxcuengh couxhek sibgvenq fungsug, Liuz Sanhcej son fwen, bin ndoi byaij gai “sam nyied sam” daengj haehlied hozdung, banh ndaej hoenghhd, yinx vwnz bae yawj lai raeuh; ngoenzde,

Cinghsiusanh Gingjih caemh laeb le daizfwen “sam nyied sam Bouxcuengh”, yienj le 4 ciengz vwnzyi yienjok hozdung, hawj bouxyouz yawj dwk angqvauvau; ngoenz cosam de, Gaiq Daih’ it Gyanghnamz Suijgaih “Sam Nyied Sam” Mbanjcuengh Hawfwen cingqsik haimuq; Gvangjsih Bozvuzgvanj、Gvangjsih Duzsuhgvanj daengj caemh guh le gak cungj gak yiengh vwnzva hozdung, hawj vunzlai dem le faenh angqyangz ndeu.

Namzningz Si gij yienhgih wng, gak cungj hozdung caemh banh ndaej nauhyied hoenghhd. Vujmingz Yen youq 4 nyied 1-7 hau hoengh banh Hawfwen “Sam Nyied Sam” Nem Ciet Lijyouz Vwnzva Loegyied, 22 hangh vwnzva, diyzuz, lijyouz, ginghmou hozdung hingzsisik lai yiengh, ndeiawj yinx vwnz. Hwngzyen、Sanglinz、Majsanh daengj yienh mbangj yanghcin caemh guh le haujlai cietgingq hozdung, hawj vunzlai youq ngoenzciet ndaej angq caemz mbat ndeu.

Liucouh Si 4 nyied 1-2 hau youq Yizfungh Gunghyenz banh le eu fwen iucingj doxdax, daengx guek 9 aen senggih miz canghfwen daej camgya doxdax, lij youq ndaw Sizsang

Vwnzva Yisuz Yenzgih banh le Gaiq Daih’ it Liucouh “Sam Nyied Sam” Minzsuz Vwnzva Baijyienj hozdung; Sanhgyangh、Yungzsuiz daengj yienh (swciyen) mbangj yanghcin caemh banh le ciet fwen “sam nyied sam”、cietbauqva daengj hozdung, hawj ngoenzciet dem saek dem rongh.

Youq Gveilnz Si, Lungzswng Gak Cuz Swciyen 4 nyied 1-6 hau banh le “sam nyied sam Bouxcuengh” cawjdaez haehlied hozdung, “ndoengva Lungzciz fwen haprwenz, ‘saulengj mbanjbya’ bau aendomq”, hawj gyoengq lwgmbauq sim humznywngnywg; ngoenzciet, Yangzsoz、Yungfuz daengj yienhgih caemh faenbied banh le gak cungj hozdung miz daegsaek minzcuz haenx, hawj vunzlai youq ndaw ngoenzciet cetyouz angqyangz dangqmaz.

Youq Bwzswz Si, Denzyangz Yen youq 4 nyied 6-8 hau hoenghhd banh le ciet lijyouz vwnzva fungsug Baeuqroxdoh, geijcib fanh vwnz bae caeqbaiq goengcoj Baeuqroxdoh; Lungzlinz Gak Cuz Swciyen caemh comz banh le “Hoihfwen Doxidax Sam Nyied Sam”, sing fwen sepset rwnzred, vunzlai cix dingq dwk

maezmwd; Yougyangh Gih Yangzhih Cin Bulinz Cunh cix gag comz ngaenz comz vwnz banh le ciet vwnzva fungsug ndawbiengz “sam nyied sam”, dawz gij fungsug ciuhgeq cienz roengzdaej haenx caenlik sengdoengh dwk baijyienj youq dangqnaiz vunzlai.

Hozciz Si Dava、Yizcouh、Denhngoz daengj siyienh (swciyen) 4 nyied 2 hau caemh banh le cietfwen, hoihfwen daengj cietgingq hozdung, hawj ndaw luegbya gyae’ gyangq haenx sing fwen haprwenz mbouj sat.

4 nyied 1-2 hau, Laizbinh Si Hinghbinh Gih、Hozsanh Si、Siengcouh Yen、Vujsenh Yen faenbied banh le “sam nyied sam” cietbuzyaq (buzva) hoihmiuh, eu fwen doxdax, yienj heiq goengsae Bouxcuengh、baijyienj vwnzva fungsug minzcuz, minzcuz conzdungj vwnzva diyzuz haehlied hozdung, hawj ngoenzciet nauhyied dangqmaz.

Cungzcoj、Gveigangj、Vuzcouh、Ginhcouh、Yilinz、Hocouh daengj si gij yienhgih ndaw gyaiguenj mbangj yanghcin caemh banh miz “sam nyied sam” cawjdaez hozdung, hawj sing fwen sing angq haprwenz doh daengx gih gak dieg.



▲ [Gvangjsih Minzcuz Bozvuzgvanj] Bouxyienj Liuz Sanhcej, haj daih de son fwen.



▲ [Ginhcouh Si] Duznamz nyi sing fwen, vwnz doxriengz daej dinga.



▲ [Mungzsanh Yen] Ngoenzciet gijgwn lai, ngaizmbokfaex haekfeih. 黄建源 关新 ingj



▲ [Cingsih Yen] Naengj caengq haexnaengj haj saek ndeu, ngoenzciet heuh beixnuengx cimz feih.



▲ [Lungzcouh Yen] Cietbauqva Ginzgyangh, diegdangz ciengj ndaej rem. 陈有才、陈浚锋 ingj



▲ [Vujmingz Yen] Soemh fwn diuq fouxsaux, mbauqsau sim angqyangz. 黄艳梅 ingj



▲ [Denzyangz Yen] Siuyieng caeq goengcoj, Baeuqroxdoh baij raeuz. 陆杰 ingj